

Ledscha davart l'acconsentimaint dal dret da vaschinadi dal cumün da vaschins da Zernez

Princip

Art. 1

Quista ledscha regla l'acconsentimaint d'ün dret da vaschinadi tras il cumün da vaschins da Zernez.

Il dret da vaschinadi dal cumün da Zernez po gnir concess a vaschins dal chantun e vaschins svizzers sco eir ad esters ed a persunas sainza naziunalità. Premiss esa chi sajan accumulidas las cundiziuns legalas da la confederaziun, dal chantun e dal cumün da vaschins.

Premissas

Art. 2

Il vaschinadi dal cumün da Zernez po gnir concess o impromiss be a persunas chi paran dad esser adattadas per quel. I ston gnir examinadas lur relaziuns persunalas, lur deport e pustüt lur vita precedainta e la basa existenziala. Ils candidats han implü dad esser integrats illa cumünanza locala.
(vair eir art. 5 e 6 da la ledscha chantunala da dret da vaschinadi)

Pretaisas da domicil

Art.3

Il vaschinadi da Zernez po gnir concess be a persunas cun domicil a Zernez. Excepziunà es il dret da vaschinadi privilegià tenor dret chantunal, obain il dret da vaschinadi a talas persunas chi survegnan il dret da vaschinadi tras üna natüralisaziun simplifichada tenor ledscha federala.

Svizzers ed esters ston avair gnü almain 2 ons sainza interrupziun lur domicil sün territori dal cumün da Zernez, e quai directamaing avant co inoltrar la dumonda da dret da vaschinadi. Scha quista pretaisa da domicil es accumulida, pon inoltrar lur dumonda tuot ils citadins svizzers, sco eir tuot quels citadins esters chi han gnü in tuot almain 12 ons domicil in Svizra e da quels tanter oter almain eir 5 ons a Zernez (eir cun interrupziun).

Esters chi nu vivan amo 12 ons in Svizra ston invezza accumplir ün temp da domicil na interrupt sün territori dal cumün da Zernez dad almain 5 ons, avant co inoltrar lur dumonda.

Excepziuns da quista pretaisa da domicil pon gnir fattas be i'rom da l'art. 8 da la ledscha chantunala.

*Proceder
a) dumonda*

Art. 4

La dumonda per pudair dventar vaschin dal cumün da Zernez es d'inoltrar in scrit, insembel cun tuot ils formulars previs e tuot la documainta pretaisa, a l'uffizi da migraziun e dret civil dal Chantun Grischun. Quel examinescha scha la dumonda es valabla e cumpletta. Scha quella po gnir trattada, vain ella datta inavant a la suprastanza dal cumün da vaschins per trattar quella.

- b) examinaziun* La suprastanza da vaschins examinescha mincha dumonda da natüralisaziun infra ses mais e fa in quel temp tuot ils sclerimaints per pudair trattar quella. Ella invida d'ürant quel temp eir la persuna petenta ad üna discussiun da qualificaziun, pro la quala i dess gnir examinà specialmaing sch'ella es integrada in nos cumün ed in nos pajais, sch'ella cugnuoscha drets ed üsits da qua ed i vain sondà co ch'ella as santa in nos cumün.
- c) decisiun* Sun dattas tuot las premissas legalas, schi suottametta la suprastanza infra ses ulteriurs mais la dumonda a la radunanza da vaschins cun üna proposta per mans da quella. Quella decida cun majorità simpla per scrutin.
- d) comunicaziun* La decisiun sto in mincha cas gnir comunicada per scrit al candidat in nommand eir motivs da la radunanza per cas ch'ella ha decis cunter üna natüralisaziun. Al candidat esa da render attent ch'el haja la pussibilità da recuorrer cunter la decisiun o cunter parts da quella al tribunal administrativ infra 30 dis daspö la comunicaziun.
- e) revocaziun* Vess il candidat d'avair obtgnü il dret da vaschinadi tras indicaziuns na vardaivlas o cun zoppantar fats decisivs, rapporta la suprastanza quai al chantun fin il plü tard tschinch ons davo ch'el ha obtgnü il dret da vaschinadi, da maniera chi pudess gnir missa in vigur üna procedura per revochar quel.

Art. 5

- Vaschinadi d'onur* A persunas chi s'han acquistadas merits specials invers il cumün da Zernez po gnir concess il vaschinadi d'onur. Scha la concessiun dal vaschinadi d'onur dess avoir ils effects d'üna natüralisaziun ordinaria, schi han dad esser dattas las premissas legalas da la confederaziun e dal chantun. In quel effet da natüralisaziun ordinaria po esser inclusa i'l cas d'ün vaschinadi d'onur be la persuna chi survain il vaschinadi d'onur ed ingüns oters confamigliars.

Art. 6

- Uffants minorens* Illa natüralisaziun d'ün dals genituors, sun inclus ils uffants minorens chi abitan cun el e stan suot sia autorità, scha que nu vain exclus expressamaing. Per l'integraziun dad uffants sur 16 ons faja dabsögn da l'acconsentimaint da l'uffant.

Art. 7

- Taxas da natüralisaziun* Pro la calculaziun da las taxas da natüralisaziun vegnan resguardadas unicamaing las spaisas cha l'administraziun e las instanzas cumünalas han gnü per elavurar la dumonda da dret da vaschinadi. Per la natüralisaziun da svizzers vain inchaschada üna taxa da max. fr. 1000.-, per quella dad esters üna tala da max. fr. 2000.- per persuna. Uffants minorens chi sun inclus illa natüralisaziun sun eir inclus in quista taxa. Pro la concessiun dal vaschinadi d'onur nu vain miss in quint ingüna taxa. La taxa vain assegnada al cumün politic.

*Vigur da la
natüralisaziun*

Art. 8

Il vaschinadi cumünal ed in cas eir quel chantunal aintran in vigur cun la decisiun da l'uffizi chantunal da migraziun e dret civil.

Licenzchamaint

Art. 9

Il licenzchamaint dal vaschinadi dal cumün da Zernez as drizza tenor ils artichels 20 e 21 da la ledscha chantunala davart l'acquist e la perdita dal vaschinadi chantunal e cumünal. Dumondas correspondentas pon gnir drizzadas be a l'uffizi chantunal per migraziun e dret civil.

*Avantags da
vaschins*

Art. 10

D'avantags da vaschins pon profitar be persunas vaschinas majorenas cun domicil sün territori dal cumün da Zernez. Pro vendita da terrain da vaschins han tals il prüm dret da cumprita i'l cas cha las circumstanzas sun las medemmas.

Vigur da la ledscha

Art.11

Quista ledscha es gnüda acceptada da la radunanza da vaschins dals 27 favrer 2018 ed aintra in vigur retroactivamaing süls 1. schner 2018.
Quista ledscha rimplazza a la ledscha dals 1. schner 2015 e tuot las otras versiuns chi sun amo plü veglias.

Il president:

l'actuar:

